

- Ha'u nia respeitus ba:
  - Ministru Negósius Estranjeirus no Kooperasaun Sua Eselénsia **Dionisio Babo Soares**;
  - Ministru Defeza no Ministru Interiór Interinu Sua Eselénsia **Filomeno da Paixão de Jesus**;
  - Ministra Solidariedade Sosiál no Inkluzauun Sua Eselénsia **Armanda Berta dos Santos**;
  - Vise-Ministra Saúde Sua Eselénsia **Elia dos Reis Amaral**;
  - Xefe Estadu Maiór Jenerál F-FDTL **Majór Jenerál Lere Anan Timur**;
  - Reprezentante Seniór Pacific Partnership tinan rihun-rua-sanulu-resin-sia (2019) Señor **Joseph Martin**;
  - Komandante Misaun Pacific Partnership **Kapitaun Randy Van Rossum**;
  - membrus Korpus Diplomátiku-sira;
  - partisipante-sira iha Pacific Partnership 2019 no distintus konvidadus.
- Boatarde. Onra ida mai ha'u, mai iha ne'e hamutuk ho ita-boot-sira hotu ba abertura ofisiál Pacific Partnership tinan rihun rua sanulu resin sia (2019).
- Lori Estados Unidos Amérika nia naran, ha'u hakarak agradese Ministériu Negósius Estranjeirus no Kooperasaun tanba organiza ona eventu espesial ida-ne'e.
- Haksolok tebes mós haree kolegas barak, parseiru-sira, no aliadu-sira mai iha ne'e iha ohin lorokraik ne'e.
- Bandeira furak-sira ne'e hotu representa nasaun-sira ho hanoin-hanesan serbisu hamutuk atu mellora povu Timor-Leste nia moris no povu hotu iha Indo-Pasífiku.
- Kooperasaun maka fundamentál ba Pacific Partnership nia susesu – ezersisiu anuál, multilaterál boot liu ba ajuda umanitária iha Indo-Pasífiku.
- Ami tau énfaze ba liafuan “Parseria” iha Pacific Partnership tanba ne'e komponente fundamentál ida iha ami-nia servisu-sira hotu ho nasaun-sira ne'ebé ho hanoin-hanesan.
- Hanesan ami-nia aliadus husi tratadu, amigu-sira, no parseiru-sira – ne'e maka nasaun-sira iha rejiaun Indo-Pasífiku ne'ebé partilla ami-nia kompromisu ba demokrasia no direitus umanus

- Pacific Partnership 2019 sei inklui ezersísius médikus, ajuda umanitária no responde ba dizastre, enjeñaria, no halo eventos ho comunidade-sira ne'ebé sei akontese iha munisípiu Dili, Liquiça, no Ermera.
- Ezersísiu tinan ne'e inklui feto no mane-sira altamente kualifikadu husi Forsas Navál, Mariña no Ezersítu Estados Unidos Amérika nian.
- Liu atus-ida-hitu-nulu (170) membrus militár Estados Unidos Amérika no membru nasaun parseiru sira maka sei hola parte iha ezersísiu ne'e, serbisu-hamutuk ho membrus F-FDTL liu atus rua (200) no Governu Timor-Leste.
- Ami-nia parseiru militár-sira representa husi Timor-Leste, Austrália, Japaun, Tailândia, Filipinas, Kanadá, Reinu Unidu no Peru.
- Ami espera serbisu hamutuk ho ita-boot-sira hotu iha semana rua tuir-mai ne'e nia laran.
- Ita sei serbisu hamutuk hodi fortalese ita-nia kompromisu atu mellora assisténsia umanitária no kapasidade resposta ba dizastre iha rejiaun ne'e.
- Ida-ne'e maka badala hitu Timor-Leste sai uma-nain ba Pacific Partnership.
- Hanesan imi barak hatene, Forsa Navál Estados Unidos Amérika nia Ró Ospital Mercy vizita ona Timor-Leste ba dahuluk iha tinan rihun rua neen (2006) no resentmentente iha tinan rihun rua sanulun resin neen (2016).
- Aleinde, vizita sira husi ró sira hanesan Mercy no Ró Navál Estados Unidos Amérika Fall River nu'udar sinál vizível balun husi ita-nia kooperasaun, Estados Unidos Amérika no Timor-Leste desfruta relasaun militár forte no kontínua.
- Tinan-tinan, maizoumenus membrus militár no defeza Timoroan hamutuk sanulu-resin-lima (15) simu treinamentu ho Estados Unidos Amérika nia Komando Indo-Pasífiku iha Hawaii.
- Atus barak liutan mak participa ona iha ezersísiu anuál sira iha Timor-Leste, hanesan iha ezersísius Crocodilo, Hari'i Hamutuk, no CARAT.

- Ami mós haksolok ho kolaborasaun no troka kapasidade entre Forsa Navál Estados Unidos Amérika Seabees ho F-FDTL nia enjeñeiru sira husi Kompañia CAS.
- Tinan ne'e marka aniversáriu ba tinan sanulu Seabees nia prezensa iha Timor-Leste.
- Sira kontinua serbisu di'ak ho sira-nia omólogo-sira hodi mellora povu Timor nia moris liuhusi harii eskola sira, klínika-sira, no projetu enjeñaria-sira seluk iha área remota.
- Ami hotu iha Embaixada Estados Unidos Amérika serbisu-hamutuk ho governu no povu Timor-Leste iha espíritu respeita-malu – no klaru – ho umildade.
- Ami nia servisu iha ne'e apoia Timoroan sira-nia metas no objetivu sira.
- Timor-Leste serbisu daudaun atu:
  - fortalese instituisaun demokrátiku-sira,
  - diversifika ninia ekonomia,
  - expande setór privadu,
  - fornese oportunidade-sira ba nia populasaun joven-sira,
  - hametin ninia setór saúde,
  - desenvolve infraestrutúra, no
  - prevene kiak ho nia efeitu-sira hotu.
- Liuhusi Pacific Partnership no esforsu-sira seluk, ami hakarak atu apoia meta-sira ne'e enkuantu harii mós interoperabilidade ho ami-nia parseiru rejionál-sira no aliadu-sira hodi asegura Indo-Pasífiku ida ne'ebé livre no nakloke, ne'ebé hanesan interese husi nasaun-sira hotu.
- Hanesan país ida husi Indo-Pasífiku, Estados Unidos Amérika nia vizaun maka hakarak orden rejionál ida iha ne'ebé nasoens hotu-hotu – boot no kiik – sai forte, independente, no livre husi koersaun.
- Ne'e maka prinsípiu fundamentál ne'ebé ami fahe ho Timor-Leste no nasaun-sira seluk iha Indo-Pasífiku. Estados Unidos Amérika sei serbisu ho kualkér nasaun ka instituisaun hodi lori vizaun ne'e ba oin.

- Rejiaun ne'e hasoru amezas no dezafius lubuk ida ne'ebé presiza ita atu hametin aliansa seguransa ba longu-prazu no haforte parseria no enkoraja aprosimasaun atu estabelese rede kooperasaun seguransa.
- Ami-nia objetivu mak atu harii rede parseirus seguransa ida ne'ebé fleksivel, reziliente hodi promove estabilidade rejionál, avansa seguransa marítima no liberdade navegasau, no hasoru dezafiu –sira ne'ebé partillada iha rejiaun.
- Tanba ne'e maka Estados Unidos América expande daudaun kooperasaun seguransa iha Indo-Pasífiku.
- Iha tinan rihun-rua-sanulu-resin-ualu (2018), Estados Unidos América fornese liu metade dolár biliaun ida iha asisténsia seguransa ba rejiaun ne'e atu fortalese seguransa marítima, asisténsia umanitária, no responde ba dizastre, no kapabilidades iha forsa-manutensaun-paz, nomós kombat krike transnasionál.
- Importante mós atu anota katak Pacific Partnership kontinua habelar Estados Unidos América nia Planu Asaun Nasionál ba Feto sira, Dame no Seguransa.
- Ne'e permite nasaun parseiru sira atu bele koordena esforsu-sira ba avansa feto sira-nia inkluzau iha atividades harii-dame, proteje feto-sira husi violénsia bazeia ba jéneru, no asesu hanesan ba ajuda no asisténsia ba rekuperasaun.
- Pacific Partnership halo tranzisaun ba nia foku prinsipál husi fó kuidadu-diretu ba fali apoia dezenvolve kapasidade kolektiva. Kualkér kuidadu-diretu sei fornese liuhusi serbisu-hamutuk ho Timor-Leste no nasaun parseiru-sira.
- Ne'e hodi asegura katak koñesimentu no kapasidade ne'ebé fahe ba malu durante misaun Pacific Partnership nian sei dura mezmú hafoin ezersísiu ne'e termina.
- Governu Estados Unidos sente orgullu apresenta Ró Forsa Navál Estados Unidos América nian Fall River no, profisionál militar no sivíl sira ne'ebé partisipa iha Pacific Partnership 2019.
- Ha'u espera atu Pacific Partnership 2019 bele hala'o ho susesu. Obrigada barak.